



Codex diplomaticus Brandenburgensis

Sammlung der Urkunden, Chroniken und sonstigen Quellenschriften für
die Geschichte der Mark Brandenburg und ihrer Regenten

Sammlung für allgemeine Landes- und kurfürstliche
Haus-Angelegenheiten

Riedel, Adolph Friedrich

Berlin, 1860

284. Kurfürst Johann's Schuldbrief für Hans Crewitz in Berlin, vom 29.
August 1490.

Nutzungsbedingungen

[urn:nbn:de:hbz:466:1-55801](https://nbn-resolving.org/urn:nbn:de:hbz:466:1-55801)

284. Kurfürst Johann's Schuldbrief für Hans Crewitz in Berlin, vom 29. August 1490.

Wir Johans, von gots gnaden Marggraue zu Brandenburg, kurfürst, zu Stettin, pommern etc. hertzog, Burggraue zu Nurmberg vnd Fürst zu Rugen, Bekennen vnd thun kunth öffentlich mit disem briue für vns, vnser erben vnd nachkommen, Das wir vnsern lieben getrewen Hannsen Crewitz, Burger In vnser Stat Berlin, Funff vnd achtzig Reinisch gulden, die er vns auf hewt, dato dits briues, gutlich vnd wol zu danck gelihen, schuldig worden sein. Solich Funff vnd achtzig Reinisch gulden Sollen vnd wollen wir oder vnser erben dem gnanten hannsen Crewitz oder seinen erben auff Martini, nest zukunfftig, widerumb on allen iren schaden reichen vnd geben, In vnd mit Crafft dis briues. Czu urkunt mit vnserm zu ruck aufgedruckten Infigell versigelt vnd geben zu Coln an der Sprew, am tag decollacionis Johannis, Im LXXXX.

Item am dunerstag XI M. virginum hat vnserm gnedigsten herrn Marggrauen Johanssen, Curfürsten etc., Hanns Crewitz Funffzeher gulden gelihen, die Im sein gnad zusampt der obbestimpten hewbtsumma bezalen soll. Actum ut supra.

Nach dem Originale des Königl. Hausarchives.

285. Kurfürstliche Räte theilen Pommerschen Räten Abschrift des Vertrages mit Herzog Bugslaff mit, am 20. October 1490.

Vnsern fruntlichen willigen dinst zuuorn, wolgeborner wirdiger vnd besundern frunde, liber herre bruder, ohem vnd Sweger. Als vff jungst gehalten tag zwischen konigspereg vnd Gartz vnter andern so gehandelt verlassen, das wir euch abschrift empfangung der lehen zuschicken solten, dieselben forder an den Irluchten hochgebornen fürsten vnd heren, heren Buxleff, hertzogen zu Stettin, Pomeran etc., vnseren gnedigen heren, gelangen zu lassen, deszhalben vnd zu forderung des handels, auch dem fruntlichen wesen, so zwischen dem durchluchtigen vnd hochgeboren fürsten vnd heren, heren Johansen, Marggrauen zu Brandenburg, Churfürsten etc., vnd dem gnanten hertzog Buxleffen etc., vnserm gnedigsten vnd gnedigen heren, ist zu gute, schicken wir euch abschrift der vertracht vnd empfangung der lehen, wie die zwischen vnd durch weylend heren Albrechten, Marggrauen zu Brandenburg, kurfürsten etc., hertzogen Erick, hertzogen Wartzleuen, seligen lob-